

Të nderuar kolegë,

Së pari, do të thosha se ne krahasimet nuk duhet t'i bëjmë me vitin 2009 dhe me vitin 2013, as me '38-ën, sepse ne nuk synojmë që Shqipërinë ta çojmë te Shqipëria e vitit 2009, por synojmë ta çojmë në BE. Kështu që ju krahasimet bëjini me vendet e rajonit dhe me vendet ku ne synojmë të shkojmë. Keni gjithë kohën kështu! Edhe sa doni ta vazhdoni këtë punë: "2009-ta ka qenë kështu; 2013-ta ka qenë kështu, kurse në jemi duke e bërë kështu."?! Si është bujqësisë? Si janë vendet e rajonit? Si është Maqedoni? Si është Mali i Zi? Minimalisht, ta krahasoni me këto. Nuk po them ta krahasoni me Italinë dhe me Francën. Për shembull, nëse krahasojmë nga viti në vit çmimet e plehrave kimike, pra vitin 2020 me vitin 2021, ureja ka qenë 35 lekë, është 60 lekë; ka qenë 48 lekë dapi, është 75 lekë. Nuk është faji i kësaj qeverie, se këto janë të gjitha importe. Problemi është se çfarë do të bëjmë ta përballojmë këtë lloj situatë. Kemi një situatë shumë tjetër shumë të rrezikshme, që e përmendi edhe zoti Sinaj, në blegtori. Misri sot kushton rreth 410 lekë. Një që merret me këtë zanat, e di që çmimi normal i misrit është 200 lekë apo 250 lekë. Sot ai është 410 lekë, kurse soja 630 lekë, të cilat të dyja janë produktet bazë të ushqimit blegtoral. Si do ta përballojmë këtë lloj situatë, se nuk është fort e lehtë për ta kaluar me të folura të bukura? Unë e përgëzoj zotin Ahmetaj, se është një nga lektorët më të mirë, se flet bukur dhe dëgjohet bukur, por merrni parasysh që keni një situatë shumë të vështirë, sidomos në bujqësi. Unë do të mundohem të them 5-6 probleme, për shkak se koha në dispozicion është shumë e shkurtër. Gjithsesi, do t'i përcaktoj me pika, nëse arrij. Nëse jo, do t'i lë përgjysmë. Fermerët vazhdojnë të protestojnë, sepse nuk u shiten produktet si pasojë e krizave që, ndër të tjera, shkaktohen edhe nga defekti me ose pa dashje në ligjin e TVSH-se. Këtu i bëj thirrje zotit Ahmetaj që të ngrejë një grup pune të takojnë ata fermerët, sepse këta e kanë bërë këtë ligjin, pra në 6 % në blerje dhe 20% në shitje. Nuk po shkon, more burrë. Unë nuk e marr vesh! Pse nuk thërrasin fermerë të majtë, se në përgjithësi të majtë janë, t'i thërrasin e t'i pyesin se do t'ia bëjnë me skemën e TVSH-së?! Të gjithë agropërpunuesit po blejnë produktet e importit. Si pasojë kemi një disproporcion të blegtorisë. Numri i lopëve për qumësht në vitin 2016 është 360 mijë krerë, kurse në vitin 2020 është 290 mijë krerë. Pra, ka rënie të numrit me më shumë se 70 mijë krerë, që do të thotë 20%. E njëjta gjendje është edhe me blegtorinë e të imtave, të cilat kanë 20% rënie. Një nga faktorët është edhe skema e TVSH-së. Pse e lëmë këtë? Pse nuk merremi me këtë? Nuk jam jashtë temës, sepse këto i konstatoj dhe i diskutoj gjithmonë me grupet e interesit dhe me fermerët. Për subvencionet direkte kam paraqitur një projektligj. Faktikisht, shoh që ka një reagim pozitiv. Edhe Ministria e Bujqësisë meriton të përgëzohet për këtë pjesë, sepse ka kontaktuar me ne për të pyetur se si mund të përmirësohet skema e subvencioneve. Sot skema e subvencioneve nuk i përfshin të gjitha fermat bujqësore, vetëm 20% e fermave, sepse pjesa tjetër nuk arrin të aplikojë. Prandaj subvencionet duhet të bëhen në mënyrë direkte. Pra, çdo njeri që merret me bujqësi dhe blegtori, do të marrë subvencione. Të riorganizohen bordet vaditëse të kullimit. Edhe kjo është një temë diskutimi që del nga fermerët, duke i shoqëruar me një buxhet të mjaftueshëm vjetor për të plotësuar nevojat në rritje të aktivitetit bujqësor. Duke qenë se jemi para stinës së shirave, duhet të merren masa për përfundimin sa më parë të kanaleve të para dhe të dyta kulluese. Ky problem u ngrit nga shumë deputetë të zonave rurale, si majtas, si djathtas. Presim të bien shira. Ato zona janë depressive, siç është

Lezha, pra janë nën nivelin e detit. Madje, edhe disa zona të Durrësit, si Këneta, katër fshatrat në Durrës, si Juba, Katundi i Ri, Sektori Rinia etj., janë përmytur dhe vazhdojnë të përmyten. (Bie gongu.) E dija që do të kisha të vështira ta përfundoja. Gjithsesi, në fund dua të them dy fjalë për atë që dëgjoj të flitet çdo ditë midis njerëzve në qytetin e Durrësit për kryetarët e bashkive. Jeni ju (u drejtohem gjithmonë qytetarëve të Durrësit) që ankohemi pse nuk keni kryetar të zgjedhur, por të emëruar, por jeni po ju që e pranoni këtë realitet të nënshtruar nga politika dhe harroni për një çast që ju e prodhoni atë. Edhe kur vjen dita të votoni njeriun tek i cili keni besim, u nënshtroheni skemave të ndyra të aktorëve politikë. Janë ata, aktorët e famshëm politikë, që selektojnë njerëz, të cilët premtojnë besnikëri ndaj tyre, jo ndaj jush, që ju bëjnë të besoni se nuk ju pyet kush. Kombinimi i interesave të politikanëve e të fortëve të zonës ju bën indiferentë për kandidaturën e radhës. Mos lejoni t'ju servirin as të Hasanit, as të Hysenit, të gjyshit apo të nipit, të myslimanit apo të krishterit, por shihni një herë të paktën interesat tuaja e jo të tyre. Faleminderit! Këtu nuk aludoj asgjë për vetë, se nuk kam ndër mend të kandidoj.